

四庫全書

史部

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷二

聖德二

雍正六年戊申二月丙戌

上諭內閣據廣東總督孔毓珣奏稱龍門協副將景慧奉
該管總兵官調取考驗渡海遭風漂沒又該協右營把
總謝廷彥輪值冬季遊巡帶領兵丁泛海亦被風漂沒

等語聞之深爲憫惻查康熙五十二年内福建臺灣廣東碣石有海洋遭風傷損官兵之事蒙

聖祖仁皇帝特頒

諭旨令地方大吏加以恩卹竝令嗣後通行但向來未曾分別官兵詳著爲例恐地方官奉行不力或至日久廢弛亦未可定朕思海洋危險之地凡官弁兵丁若因公事差委遭風受困者當照軍功加恩儻有不幸至於身故者當照陣亡之例優卹再漕運船隻在大江黃河危

險之處遭風漂沒者亦係因公情實可憫又如黃河下
埽之人辦理工程不惜身命均當比照軍前之例定以
恩卹之條著九卿分別詳細定議具奏

十一月己酉

上諭內閣朕御極之初即降諭旨令諸臣不必進獻儀物
雍正三年冬諸臣以初行吉禮有進獻器皿書籍筆墨
者朕酌收一二隨降旨令在京大臣嗣後停其進獻至
在外督撫進本省方物土宜蓋以土產諸物乃各省所

出該督撫藉此以展其敬愛依戀之心朕亦因以昭上下一體之誼其物不嫌於輕微簡畧者所重不係乎物也今各省督撫中尚有未能深體朕心於土產之外復以器玩進獻者朕思督撫職任封疆用度繁多特爲籌畫養廉之項原以供其日用要務之需安能尚有餘資購求古玩儻在己不能購求轉向屬員索取尤爲不可人臣事君之道惟在至誠至敬豈僅在區區進獻之豐美乎儻能永矢丹誠爲地方安民察吏薦舉廉幹爲國

家供職分猷其可寶可貴豈不遠勝於連城之璧乎茲特再行宣諭儻或仍有進獻古玩者則並其方物土宜亦行擯却

雍正七年己酉三月甲寅

上諭內閣自古帝王皆有功德於民雖世代久遠而敬禮崇奉之心不當弛懈其陵寢所在尤當加意防衛勿使褻慢至於往聖先賢名臣忠烈其祠宇塋墓亦當恭敬守護以伸仰止之忱著各省督撫轉飭各屬將境內所

有古昔陵寢祠墓勤加巡視防護稽查務令嚴肅潔淨以展誠恪若有應行修葺之處著動用本省存公銀兩委員料理朕見歷代帝王皆有保護古昔陵寢之勅諭而究無奉行之實朕於雍正元年恩詔內即以修葺歷代帝王陵寢通行申飭亦恐有司相沿積習視爲泛常嗣後著每年於歲底令該地方官將防護無誤之處結報督撫該督撫造冊轉報工部彙齊奏聞儻所報不實一經發覺定將該督撫及地方官分別議處明太祖陵

在江寧昔我

聖祖仁皇帝屢次南巡皆

親臨祭奠禮數加隆著江南總督轉飭有司加意防護其
明代十二陵之在昌平州者自本朝定鼎以來即設立
太監陵戶給以地畝令其虔修禋祀禁止樵採

聖祖仁皇帝屢頒

諭旨嚴行申飭著該督轉飭昌平州知州昌平營叅將差
委人員時加巡視務令地境之內清淨整齊儻陵戶或

有不敷即著該督酌量增添其南北二處陵寢防護無誤之處亦著該督撫等於每年歲底冊報工部彙奏

五月戊申

上諭內閣朕見臣工等奏章間有用山川効靈洪福齊天及一切頌揚背理之詞諄諄訓誡至於再三宜乎中外共知朕心矣乃昨衍聖公孔傳鐸奏賀慶雲本內竟用乾坤効靈之語朕覽之實爲悚惕不寧之甚朕於事

天事

神至誠至敬惟望

天地神祇俯垂默佑錫福兆庶共享昇平若云感召

天和或云受

天之祐或云昭示靈應似此等語作頌揚之文尚於義不悖而於心亦安今乃謂

天地神祇効靈於人君豈不聞王者父

天而母

地而敢爲此褻慢之語乎且朕之事

天亦猶臣下之事君也臣之視君也以爲九重之尊而以人君視

天其相越之分又不啻九重而已也設以屬員頌其上官而稱爲上所崇奉或稱爲福與君齊彼爲上官者能安受而不戰慄乎今以効靈齊

天等語見諸奏章何以異是不惟不知立言之體亦大失敬謹事君之道矣昔我

聖祖仁皇帝深惡此等陳奏之詞常加訓誨今著再行申

諭內外臣工知之嗣後如有仍用此等字樣者著通政司即行叅奏如送內閣即著大學士叅奏

八月庚申

上諭內閣前據浙江署督性桂署撫蔡仕舫等奏進湖州居民王文隆家萬蠶同織瑞繭一幅長五尺八寸寬二尺三寸父老皆稱爲從來未有之事朕恐小民圖利望恩或用人力造作而成因令性桂等詳細體訪務令確實勿爲所欺昨性桂蔡仕舫等於本地詳加驗看訪察

實係自然成就竝不由於人工具摺覆奏廷臣等以蠶桑織紵乃衣被之大原養民之切務今浙省有此瑞應則小民溫暖可期咸爲國家稱慶朕素不言祥瑞數年以來每遇休徵必倍加乾惕儆戒所頒諭旨至再至三朕愛育元元務期普天率土之人同霑實惠一時希有之物不足以禦饑寒儻蒙

上天俯鑒惓誠錫福黎庶蠶桑普盛衣食充盈乃朕心之所謂祥瑞也

雍正八年庚戌正月戊戌署直隸總督唐執玉奏
正月二十日鳳凰見於房山

上諭內閣朕素不言祥瑞屢降諭旨甚明上年據散秩大
臣尚崇廩奏稱天台山民李萬良等呈報十一月十三
日黎明見山中有一神鳥高五六尺毛羽如錦五色俱
備所立處羣鳥環遶北向飛鳴等語朕以邊地居民所
見事屬渺茫將所奏發還未曾宣示廷臣昨據總理石
道事務散秩大臣常明侍郎宗室普泰奏稱石工監督

司官田周呈報正月二十日在房山縣石梯溝山中見
瑞鳳集於峯頂五色俱備文采燦然工匠樵牧居民人
等約千有餘人莫不共見又據總兵官管承澤及順天
府府尹孫嘉淦等所奏亦皆相同朕亦俱未宣示廷臣
可以知朕心矣今據署總督唐執玉繕本具奏朕思古
稱鳳鳥乃王者之嘉祥朕撫躬自問功德涼薄不足以
致鳳儀之上瑞此事猶疑而未信也

四月己酉

上諭內閣今年三月京師一帶雨澤愆期朕衷甚爲憂慮
齋心默禱至三月二十五日得降時雨似覺霑足朕心
稍慰昨據署直隸總督唐執玉奏報各屬得雨情形畿
輔雨澤尚未周遍朕悉心殫思推求體察朕之用人行
政朝乾夕惕之念實八年如一日此朕可以自信仰邀
上天垂鑒即在朝滿漢文武大臣等亦皆勤慎供職無貪
殘不法之人忝竊高爵以致上干

天和者惟是政務中有清查旗地寬免積欠二件乃近來

降旨施行之事查國家定制旗人地畝不許民人典買例禁甚嚴乃無藉之徒不遵禁約彼此私相授受以致諸弊叢生姦僞百出爭訟告訐大爲人心風俗之害實有不得不清查釐正者朕又念此等積弊沿習多年按律究治有所不忍於是特降諭旨寬其違禁典買之罪且命動支內帑給價歸贖使旗地仍歸旗人不至爲民人巧占民人仍得原價不至資本子虛永息爭端革除弊竇此朕格外之恩也或者差往清查之人奉行不善

以致民心怨抑上干

天和靳茲雨澤乎又如查免積欠之旨乃今年二月中旬頒發者自是以後京師一帶風多雨少有微旱之象想此等拖欠錢糧之劣員上虧國帑下剥民膏爲天理所不容國法所難宥或者

上天以朕查免之旨涉於邀譽市恩而非瘡惡懲貪之道是以昭垂此象以示儆乎近來舉行之事祇此二端而天象如此朕心不能無疑著內閣九卿悉心詳議具奏儻

此二事之外有應行陳奏之處亦著據實具奏毋得隱諱

戊午戶部奏太平峪建立紅椿撥換田房遷移寺

廟一切事宜

上諭曰風水地內所有民間田畝按其陞糧科則照應得之價加倍賞給已經耕種者俟收成後再令交官村莊廬舍悉照房屋間櫺加倍先給銀兩俟其將遷居之處收拾周備再令搬移各村舍所種樹木亦著給與價值

一應寺廟於風水地紅椿之外照式官爲蓋造如該寺廟有香火田地亦著將新建寺廟附近地畝加倍撥給至所有墳墓悉照地之大小從厚賞給地價俟卜有平穩之地再令遷移務使民間從容寬裕各霑實惠其應需各項價值悉於內庫支領

己未

上諭內閣朕澄清吏治整飭官方時時訓勉大小臣工實心供職以熙庶績而惠兆民又恐職官甚多優劣不等

或視誥誡爲具文不知儆惕是以遇有叅處之案率按例處分不稍寬貸蓋欲其謹小慎微時時檢束自不至踰閑蕩檢干犯重罰也而外省督撫等亦皆遵奉法紀察吏嚴肅不肯寬假姑容內外之考課如此竝非苛刻以待臣下也近年以來朕畱心體察内外文武大小官員雖不盡大法小廉而奉公守法各勤職業者多朕心深爲嘉悅但從前叅罰之案累積漸重擬於今歲秋冬之間開恩寬免以示獎勵曾向大臣等言之今者京師

雨澤愆期朕虔加修省竝推求政事之缺失而不得其
由因思朕原有寬免各官叅罰之心而未曾降旨或者
內外數百人員之中固有罰當其罪者亦有限於成例
情屬可原者應即頒諭旨廣沛恩施咸予以自新遷善
之路除特旨永停俸祿者不行開復外著將內外滿漢
文武大小官員一應革職降級畱任及罰俸停陞之案
悉行寬免准其開復儻此降革人員開復之後將來有
犯貪贓侵蝕不法重罪者著於本內聲明具奏

辛酉大學士張廷玉等遵

旨覆奏清查旗地寬免積欠二事慮周恩溥無可擬議臣等過愆日積當益加省勉

上諭曰人情自以爲是者多而能自省者少是以古昔聖賢莫不以箴規匡諫爲貴朕以誠心接待諸大臣若諸大臣偶有過愆朕即面加誥誡冀其速改若朕躬稍有過失則當隨時匡正以輔朕之不逮此廼切望於諸臣者也近因京師雨澤愆期朕默加修省悉心體察一切

政務皆與內外大臣等商酌而後舉行惟有清查旗地寬免積欠二事出於朕心之獨斷竝不由於臣工之條奏亦未諮詢商度於廷臣今見

天象如此朕心不能無疑是以降旨詢問至於諸大臣之供職尚屬勤慎小心若有應行教導悛改之處朕自隨時指示

六月甲辰

上諭內閣周書洪範言人身五事若有得失在天之休徵

咎徵即各以其類應之此即朕每日所諭天人感應之理捷於影響者也夫所謂修人事以感召

天和者必須君臣上下各盡其道各殫其誠以爲昭事

上天之本若人君有朝乾夕惕之心而大臣官員不能承流宣化或君臣有移風易俗之念而民情士習不能革薄從忠則偏而不全不克成會極歸極之盛而欲冀

上天俯垂默佑普錫繁禧也豈不難乎是以爲君存推諉於官民之心者非賢君也爲臣爲民而存推諉於君上

之心者非良有司良百姓也惟當各盡其道以待

天恩近見直省各處奏報雨澤頗覺均調麥秋亦屬豐稔朕心深慰但聞江浙雨水稍多田禾間有澇溢之患朕悉心推求其故想因今年春夏之交京師雨澤愆期朕爲畿輔祈禱竝憂慮及於江浙地方已而京師得雨而朕心專爲江浙祈求至南方多雨情形朕未曾聞知但以少雨爲懼所以朕屢諭外省大臣凡覺有水旱之幾即當速奏朕知之者正爲此也南方既已多雨而朕心

仍復祈求或因此一念以致

上天賜雨過多浙省有滂溢之處乎又考之洪範曰狂恒
雨若浙省素稱人文極盛之區今年會試朕加恩取中
至七十名而一甲三人悉登浙士或者士子之心不免
矜驕之氣如洪範之所謂狂者致干恒雨之徵此朕就
目前之

天象人事而推測之有不能無疑者朕每遇雨暘不時即
撫躬自省不敢玩忽況古聖人之垂訓千古爲昭惟願

浙之多士遇登進之榮即凜盛滿之戒見示儆之象益深敬畏之心必能仰邀

天眷於方來矣

丙辰河東總督田文鏡奏豫省士民感戴

皇仁恭建

萬壽碑亭

上諭內閣朕以實心實政訓示天下臣民如稱功頌德建立萬壽碑亭鏤金刻石之舉皆屬粉飾虛文朕所不取

前以豫省官方整肅民俗醇良感召

天和屢豐有慶是以特加恩賜用示褒嘉該省官民紳士
感激朕恩惟有益加黽勉永爲循吏良民以承

上天之眷佑至於撰文建碑稱揚功德不過外觀之虛文
耳嗣後他省若有倣倣而行者著該督撫先期諭止之
十一月己巳

上諭內閣惟

至聖先師孔子道冠百王功高萬世朕景仰企慕寤寐

弗設備舉崇奉之儀用申報享之願查世襲官爵歷代俱有成規而

聖廟執事之員向來未加爵秩所當廣置官僚以光祀典今欲特設

聖廟執事官三品者二員四品者四員五品者六員七品者八員八品九品者各十員各按品級給與章服每逢

聖廟祭祀之時虔肅冠裳駿奔趨事凡此人員著衍聖

公於孔氏子孫內選擇人品端方威儀嫺雅者報部充補每年各給俸祿銀二十兩其孔氏子孫內有情願充補之人或曾經出仕而退休在籍者或身有職銜而未曾出仕者以及貢監生童等皆可入選若屆鄉試之期有情願入場者准以監生入場應試朕意如此著大學士等會同該部定議具奏

十二月壬戌

上諭內閣皇五子致祭闕里

文廟典禮告成回京奏稱恭謁

孔林周視規制見享堂牆垣間有年久傾圯之處朕尊
崇

先師夙夜罔斁今廟貌已經鼎新林園允宜修葺著欽
天監選員前往會同衍聖公孔傳鐸相度方位宜於何
時營治詳慎定議屆期朕命大臣前赴曲阜與衍聖公
孔傳鐸協同敬謹修理務令崇闕堅固光垂永久以昭
朕尊禮

先師之至意

雍正十年壬子七月丁亥山東巡撫岳濬疏報鉅

野縣牛產瑞麟

上諭內閣山東地方前歲被水百姓不獲寧居去夏今春雨復愆期朕遣官發粟賑恤多方幸未至流離失所即京師去夏今春晴雨亦不均調西北兩路不得已用兵征戍將士露處於外備極勞苦朕心戒懼修省但知感上天垂象示儆之恩不敢望嘉祥之誕錫今聞瑞麟產於

東省實增愧悚該撫奏請詔付史館宣示中外皆屬虛文將朕朝乾夕惕對越

上天之惓忱曉諭天下臣民共知之

己酉

上諭內閣據湖南巡撫趙弘恩奏稱南嶽爲朕主壽之山廟宇碑亭宜加重葺朕思皇天無親惟德是輔朕受天眷命爲天下主一行事一舉念皆

上天

皇考之所照臨若身無失德自蒙垂慈護佑儻德行有虧
居心行事獲罪於天天下億萬臣民豈能代朕祈禱而
寬其譴責乎朕御極以來無日不以此訓示天下臣民
凡有奏請建壇誦經爲朕祝釐延壽者悉嚴諭禁止至
於山嶽江河之神爲地方捍患禦災錫福兆庶者則虔
修祠廟潔誠展祀以申報享之忱並非爲朕一身祈福
也

上天

皇考實鑒此衷南嶽之神佑我楚民廟貌久未修理應照該撫所請敬謹舉行惟是趙弘恩陳奏之詞識見鄙陋不知朕心用頒此旨再行宣諭俾衆共知之

十月癸酉大學士九卿等奏

聖祖功德常昭

景陵瑞芝疊見請宣付史館昭示中外

上諭曰朕從來不言符瑞時時訓諭天下臣民屏虛文而務實行是以數年來各處奏報慶雲嘉穀等事朕悉降

旨訓勉未嘗宣示於外以爲祥瑞也惟是今歲秋間準
噶爾賊人侵犯北路深入我境我師奮擊大獲全勝殲
賊萬餘行間軍士及邊外蒙古無不額手歡呼以爲從
來未有之大捷非荷

上天

皇考默佑何能至此朕心方深感激而瑞芝適產於

景陵天人協應信而有徵仰見

上天

皇考福國庇民特賜嘉祥以昭示天下之臣庶也朕與諸大臣等同此慶幸歡忭之惓忱著照所請宣付史館

十二月壬申大學士九卿等以廣東總督鄂彌達等所進瑞禾奏請頒示中外宣付史館

上諭曰朕從來不言祥瑞數年以來各省嘉禾瑞穀悉令停其奏報今年廣東督撫以該省所產之穀長莖多穗爲史冊所未載具摺奏聞朕爲粵東農民稱慶偶令廷臣觀覽竝非誇張瑞應也所請頒示中外宣付史館之

處不必行

雍正十一年癸丑正月壬子

上諭內閣朕躬謁

陵寢見沿途地方安設水缸甚多或動支錢糧或派用民
力著查明具奏地方官職司民牧當以休養百姓爲務
若祇以灑道清塵爲迎合朕心之舉錯謬已甚鑒興所
過即畧有塵土亦復何礙伊等於此等處過於用心轉
被朕之譴責何不以此用之於民生吏治重受朕之嘉

獎耶一併傳諭知之

七月庚子四川總督黃廷桂奏潼川州鹽亭縣牛

產瑞麟繪圖進呈

上諭內閣朕從來不言祥瑞屢降諭旨甚明上年山東巡撫奏產瑞麟朕將朝乾夕惕之心宣諭中外不准臣工奏賀今川省瑞麟再見朕心倍加愧悚惟在吾君臣共修實政士庶共敦實行庶幾感召

天和潛消災沴年穀順成萬民樂業此朕心之所謂祥瑞

也

雍正十二年甲寅四月庚午

上諭大學士等朕於一切器具但取樸素適用不尚華麗
工巧屢降諭旨甚明從前廣東曾進象牙席朕甚不取
以爲不過偶然之進獻未降諭旨切戒今則獻者日多
大非朕意夫以象牙編織成器或如團扇之類其體尚
小今製爲座席則取材甚多倍費人工開奢靡之端矣
著傳諭廣東督撫若廣東工匠爲此則禁其毋得再製

若從海洋而來後此屏棄勿買則製造之風自然止息矣

十月己巳諸王大臣等奏

景陵寶城山產瑞芝九本恭請宣付史館

上召入諭曰今歲元旦立春喜遇四寅仰蒙

上天特賜盈尺之瑞雪朕心感慶期與臣民共加儆勉自春及秋直省地方雨暘時若除北直江南近水數縣河流有漲溢之處陝西數縣得雨稍遲外其餘則甘霖應

候禾稼豐登雖不敢遽稱大有之年而各省年穀順成大率相類誠爲罕覯此皆

上天

聖祖賜佑國家顯然昭著者今當萬寶告成之候西師報捷之時欣覩瑞芝九本產於

景陵寶城最近之山上屈指數年以來三秀之瑞已經四見實廼

上天恩賜以表彰我

皇考之聖德神功欲使中外臣民咸知樂利養恬共享昇平之福者皆我

皇考之所留貽非偶然也據此則諸王大臣等奏請宣付史館昭示中外於理應行至謂朕純孝所感朕實愧不克當并曉諭天下臣民共知之

十二月乙卯

上諭內閣從前臺灣北路大甲西等社頑番不法官兵已經勦滅餘黨亦已就擒叛犯之律所有眷屬一併緣坐

無可寬貸朕念此等愚番冥頑無知究非漢民可比從前妄行不法罪在正犯其眷屬散處各社未必知情今當平定之時若一一搜查不無牽累驚擾用是格外加恩免其根究該督撫提鎮可仰體朕心妥協辦理以安番衆竝將朕諭明白宣示咸使聞知儻朕如此開恩而愚番等仍不知感激再有干犯法紀者則是蠢頑不靈之輩不可以恩惠化導朕必加以重懲

雍正十三年乙卯正月己卯

上諭內閣今日諸王大臣等以雍正十二年十月二十九日慶雲見於雲南之大理等府又見於廣東之高州府又山東寧陽縣產毓麒麟嘉瑞駢臻仰見

上天慈恩福佑具摺稱賀朕向來不言祥瑞非為謙讓之虛文歷年以來各省多有慶雲之瑞茲又值朕生辰雲南廣東兩省同見

上天昭示嘉祥但兩省慶雲何如處處雨暘時若俾歲歲五穀豐登萬民樂利斯真可謂

上天慈佑爾等爲朕思之何由使宗室天潢之中人人品行端方何由使八旗根本之地事事奉公守法何由使六卿喉舌之司紀綱整飭萬事咸宜何由使封疆守土之吏大法小廉萬民安業朕之願望常多未滿則斯產麟何足深慶若以產麟爲朕德所感益屬朕所不居傳言誠能格天朕十二年來懇切至誠時時訓誡爾諸王大臣所頒諭旨不下數千萬言而諸王大臣尚未盡能激發天良公正無私實心辦理國家政事則是朕於人

心未盡感格而謂能感格

天心實不敢自信也朕惟益加黽勉爾諸王大臣亦當各思所以答朕諄諄期望之至意至於朝廷一絲一粟皆天下之民脂民膏如朕今者解衣以賜此衣雖被於朕躬實未嘗成之朕手揆厥由來仍是萬民脂膏豈朕所得而自有哉凡一絲一粟用得其當則是以民力所成者令教養民生之人食其美報朕與斯人兩居其是用不得其當則是以民力所成者供剝削民生之人恣其

暴殄朕與斯人兩居其非如其是也朕亦何可言功如其非也朕豈得不引爲己咎爾諸臣自思之必如何而後可使君臣之施受常居其是又何忍受君之恩而轉使君爲爾等受過乎夫大小臣工各有職業孜孜矻矻尚恐隳廢安得有寸晷餘閒優游逸樂如果無可辦之事有此一刻清閒此即

上天所賜之福當及時思其職業何事當爲思其過愆何事當改主敬二字實不可以須臾離者主敬則昏惰自

去精明自生有事無事心常惺惺斷不肯別尋無益之
消遣以致縱欲敗度爾諸王大臣亟須猛省奮勉厚自
期待果能實心實力辦理國家政事俱成朝廷公正之
大臣則澤被生民感召

天貺將使四海九州之大盡致五風十雨之徵此時再感
上天慈佑賀朕瑞祥豈不更勝於慶雲屢見麒麟疊生乎
是乃朕所切望者諸臣尚各勉旃

六月辛卯

上諭內閣自古地方官員有進獻方物之禮蓋以地土所產貢之於君所以將其誠意而爲君者鑒其意而酌納所以篤堂廉之誼聯上下之情也朕即位以來亦循照舊例間有進獻珍寶古玩者朕槩降旨停止向來鎮臣中亦有隨督撫進獻者朕皆諭止之至於所獻之物備隨時賞賜內外臣工以示家人一體之意竝非朕所需用而收貯內府也雖臣之効忠於上君之加恩於下不在乎此然亦儀文禮節之一端所以歷來未廢凡爲督

撫者既以此將其誠敬之悃則當於採辦之時厚其價值俾所屬官民歡忻從事方爲事君盡禮之實心乃朕向聞各省大員採備貢物有恃上司體勢發價減少者以致民間受累視爲畏途如榆次不敢種好瓜肅寧畏植好桃外間傳爲話柄近朕訪聞福建採買柑果有短價累地方官民之處則與君臣聯接之本懷大相違背朕豈肯爲此無益之儀文而令承辦之微員貿易之百姓或受擾累哉以貢物而累及閭閻萬萬不可即或交

與屬員代辦而價值不敷令其暗中賠補是又假公濟私收受賄賂之巧術也似此食用微物朕發價市買何所不得豈肯絲毫累及地方可通行曉諭督撫等自接奉此旨爲始著將從前貢物之數再減一半儻仍蹈舊轍朕必將各省貢獻之例全行禁止

大清世宗敬天昌運建中表正文武英明寬仁信毅大孝至誠憲皇帝聖訓卷二

欽定四庫全書

史部

世宗憲皇帝聖訓卷三
四

臣 永瑤 恭 校

編修臣 裴謙覆勘

總校官原任中允臣王燕緒

校對官中書臣王鍾泰

謄錄監生臣畢所誦

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷二

聖孝

康熙六十一年壬寅十一月丙申

上孝思哀痛饘粥不進諸王大臣等合詞奏請節哀竝勸

進饘粥

上諭曰仰思

皇考深恩不但諸王大臣哀慕無窮凡官員兵民均茲依戀况朕親承鞠育盡孝盡哀乃為子之道奚能自己且朕既受付託之重朕自酌量可進飲食朕自少進若勉強飲食反於朕躬無益嗣後不必勸奏

丁酉

上諭總理事務王大臣曰朕受

皇考深恩如天罔極忽升

仙馭攀戀無從惟有朝夕瞻近

梓宮稍盡哀慕之忱今王大臣等所議安奉之處或在南海子或在鄭家莊此二處隔越郊外離宮禁甚遠朕心不忍緬惟

世祖章皇帝大事時曾安奉景山壽皇殿朕意亦欲安奉於景山壽皇殿庶得朝夕前往親行奠獻

辛丑

上即位

詔諭天下曰惟我國家受

天綏佑

太祖

太宗肇造區夏

世祖章皇帝統一疆隅我

皇考大行皇帝臨御六十一年德茂功高文經武緯海宇

寧謐厯數悠長不謂謝棄臣民遽升

龍馭親授神器屬於藐躬朕

皇考大行皇帝

德妃之子昔皇二子弱齡建立深為

聖慈鍾愛寢處時依恩勤倍篤不幸中年神志昏憤病類風狂

皇考念

宗社重任付託為艱不得已再行廢斥待至十有餘年沈疾如故痊可無期是以

皇考升遐之日詔朕纘承大統朕之昆弟子姪甚多惟思一體相關敦睦罔替共享昇平之福永圖磐石之安孔

子曰三年無改於父之道我

皇考臨御以來良法美政萬世昭垂朕當永遵成憲不敢
少有更張何止三年無改至於

皇考知人善任至明至當內外諸大臣朕方亟資翊贊以
期始終保全務宜竭盡公忠恪守廉節俾朕得以加恩
故舊克成孝思儻或不守官箴自干國紀既負

皇考簡拔委用之恩又負朕篤愛大臣之誼部院屬吏直
省有司亦宜實心任事潔已奉公不得推諉上官自曠

厥職天下百姓受

皇考恩澤日久蠲賑頻施勸懲備至間有愚氓甘犯律令
皇考每遇讞決必加詳審爰書累牘披閱靡遺少有可生
之路立施法外之仁凡我百姓各宜孝親敬長畏罪懷
刑以副朕仰法

皇考如天好生之意茲因諸王貝勒大臣文武官員人等
僉謂天位不可久虛

宗社允宜蚤主再三陳請朕勉徇輿情暫抑悲痛於是月

二十日祇告

天

地

宗廟

社稷即皇帝位以明年為雍正元年仰惟

先志之宜承深望皇圖之永固遙昭新化期衍舊恩於戲
追慕前徽繼述無忘於夙夜廣推聖澤恩膏願被於寰
區凡爾親賢文武其共矢盡誠各輸心膂用紹無疆之

業永垂有道之庥布告天下咸使聞知

是日

上諭禮部朕惟自古聖賢之君必有顯號徽稱以昭功德之盛垂於萬世此國家不易之鉅典也仰惟我

皇考大行皇帝臨宇六十一年蚤承大統寅畏小心旦明凜昭格之忱

郊祀親升中之典監於成憲率由舊章孝奉

兩宮尊養兼至展敬

陵

廟備物盡誠總攬萬幾阜成兆姓蠲賦動盈千萬賑恤曾
不稽時水旱先籌雨暘必達寬刑肆赦德洽好生盛暑
則釋囹圄嚴寒則賑饘粥兵糧預給優賞頻頒淮甸屢
巡動數百萬之帑金運

睿謨而兩河底績魯邦特幸行數千年之殊禮屈

帝尊而九拜崇師覽奏牘而利弊周知覲臣僚而賢愚立
辨保全勲舊庇廕宗支廣育人材敦厚風俗布昭聖武

申討不庭元裔背叛而旋踵就殲三孽逆命而剋期獻
馘鄂羅斯占喀爾喀之疆圉諭以威德即奉約章喀爾
喀逼厄魯特之暴殘納其困窮胥登衽席噶爾丹肆毒
鄰境三臨絕漠掃靖烽烟策妄阿喇布坦摧滅與國出
師命將恢復藏地臺灣置郡紅苗革心南朔東西無思
不服至於天縱生知日新好學講筵時御手定六經廣
博士於五賢配先儒於十哲文婉二典書邁百家貫徹
天文總括地理旁羅術數考正元聲研索羣編鑒裁纂

輯凡此難名之美善洵亘古帝王首出之一人雖復累牘連章不能紀述萬一朕方與天下臣民均切怙戴不意

龍馭上賓顧予沖人嗣膺大統仰承佑啟之恩敢後顯揚之禮謹考彞章宜升

尊諡爾部詳察典禮具奏

是日

上諭禮部朕惟君國之道必崇孝理化民之本務重尊親

欽惟我

母后仁承天德順協坤儀恭儉溫慈懋昭淑範恩勤顧復
誕育藐躬朕纘荷鴻圖恭承

懿訓顯揚聖善儀典宜隆式考舊章恭上

皇太后尊號爾部詳察典禮具奏

壬寅諸王大臣請遵

大行皇帝遺詔二十七日釋服

上諭曰

皇考大行皇帝聖德神功罕有比倫實為亘古未有之

聖君朕亦不宜行近代相沿之典禮釋服之制以日易月
雖始於漢文而高宗諒陰三年獨非古制乎朕不能上
比高宗而哀慕之情不能自己且稽之史冊漢文以來
誰能媲美

皇考則朕又安忍守漢文二十七日之制乎本朝舊制釋
服亦待百日之期庶可稍盡思君思父之哀衷揣爾等
之意惟恐過勞朕躬殊不知朕若持服尚可少進饘粥

暫眠苦塊如必強朕釋服則朕必至寢食俱廢矣朕言
及此曷勝嗚咽爾諸王大臣其諒之

甲辰諸王大臣等以

郊

廟祀典不可久闕考據典禮合詞懇請遵

大行皇帝遺詔以二十七日釋服

上諭曰覽諸王大臣所奏引據經書義理明晰朕惟有嗚
咽悲慟耳始知為君之難祇此持服一節乃天子第一

苦衷曾不如臣庶尚能各盡其心雖勉從所請朕之哀思因茲愈切矣

乙巳總理事務王大臣等奏

大行皇帝尊諡廟號乃追崇大典臣等管窺蠡測未能仰盡高深恭祈

睿思親定以昭垂萬世

上諭曰

皇考大行皇帝尊諡廟號諸王大臣等請朕親定朕思子

臣尊崇君父之心何有止極然必須至允至當方孚千秋定論若少有溢美之詞不獨失天下之至公且開後人之僭越是因臣子之愚忠愚孝轉將君父盛德大業之實行涉於贊頌之虛文朕心殊不安也我

皇考大行皇帝纘繼大統舊典本應稱宗但經云祖有功而宗有德我

皇考鴻猷駿烈冠古鑠今拓宇開疆極於無外且六十餘年手定太平德澤溥萬國來王論繼統則為守成論

勲業實為開創朕意宜崇

祖號方副豐功但追崇大典攸關理應僉謀共協爾諸王大臣等會同九卿詹事科道文六品以上武四品以上詳考舊章從公確議毋得依違毋得附和務期紀實以垂萬年

十二月甲寅奉安

大行皇帝梓宮於壽皇殿諸王大臣等合詞恭懇

皇上節哀

上諭曰我朝自

太祖

太宗

世祖以至

皇考咸貴實行不尚虛文朕受

皇考教誨鞠育迄今四十餘年恩勤篤摯慈愛無窮今遇
皇考大事五內哀痛至情迫切實不能已朕非於此自謂
盡孝亦非博盡孝之虛名也况

天降縞雪林木皆白自安奉

梓宮羣鴉環繞殿庭哀鳴七夜仰觀

天意俯察物情尚且如此朕能已於沉痛乎今

梓宮奉移壽皇殿朕未釋服之前必每日三次親詣獻食
一月內每日一次親詣獻食一月後數日親詣一次如
此庶可少釋悲思若欲朕銜哀強制朕心愈無以自解
爾諸大臣不必再奏

丁巳

上諭內閣九卿翰林詹事科道等朕仰荷

祖宗眷佑續承大統恭上

皇考聖祖仁皇帝

尊諡敬念

太祖高皇帝

太宗文皇帝

世祖章皇帝

三聖相承功高德盛載考典章加上

尊諡因念

孝莊文皇后肇基翊運啟佑

兩朝朕在冲齡備膺慈愛

孝康章皇后誕育

先皇懿徽流慶

孝惠章皇后德隆福厚篤愛朕躬朕意亦宜竝加

尊諡但追尊固出至情而推崇必遵定禮爾等可酌古準

今會同確議俾朕得稍展思慕之誠又念

仁孝皇后作配

皇考孝敬寬仁坤儀懋著

孝昭皇后恪恭溫順樹範宮闈

孝懿皇后徽音淑德慈撫朕躬恩勤備至均應恭上

尊諡以昭示萬年內閣九卿翰詹科道會同詳察典禮具

奏

雍正元年癸卯正月壬寅

上諭總理事務王大臣等曰

母后誕育朕躬續承大統謹考彛章請上

尊號

母后以

皇考梓宮奉移

山陵之事未畢不忍即受

尊稱前據王大臣等合詞虔請敬上

仁壽皇太后尊號

盛德謙光屢辭不允諸王大臣援引舊典懇求再三始蒙

慈允今恭上

冊

寶典禮亟應舉行

母后聖意仍欲遲遲朕復再四陳懇未蒙許允現今

山陵之期已近尊崇大典諏吉何時總理事務王大臣會

同禮部九卿確議具奏

是日總理事務王大臣等議奏前往

陵寢之處歷考宋明以來皆無嗣主親送梓宮之事祈

皇上念

宗廟

社稷之重任以慰臣民之心

上諭曰凡事當遵奉

祖考已行典禮方為盡善前

曾祖母太皇太后發引時

皇考親自恭送至

祖母皇太后發引時

皇考聖躬違和兼有足疾尚且

親送

梓宮啟行諸王大臣豈能勸止乎親送

皇考梓宮至

山陵朕意已定大臣等勿再強奏

二月己巳恭上

聖祖仁皇帝尊諡禮成

詔諭天下曰古帝王有出世之勲必有非常之諡故黃帝

表中和之美，顓頊著謙約之文，大行受大名，揚光本因乎法地有功，兼有德加號，必極於同天。此追尊之鉅典，守國之常經也。恭惟我

皇考大行皇帝受籙綿長，膺圖悠久，以生知安行之至聖，行存誠主敬之實功，無一事不上合

天心，無一念不下周民，慮禋郊饗

帝歲必躬行祈穀佑民典，恒虔舉

慈闈定省宗系展庸問夜求衣卑宮菲食萬幾悉歸於盡

善庶政一出於大中式勸官方廣開言路獎廉課吏敕
法儆邪器以使人公能服衆賑卹之詔屢下十行蠲免
之租動成千萬寬刑肆赦發帑賚兵巡省恩膏備詳方
策治河經畧具載史書以自強不息之精神為久道化
成之事業武功之赫濯則蕩清三孽平定沙漠元裔滅
除臺灣置郡收水西而撫紅苗定吐番而復三藏文德
之光華則親臨太學特幸闕里嚴飭學臣敦訓士子增
博士之員躋十哲之享手定五經窮研六藝詩同雅頌

文婉典謨學貫百家聖實天縱深仁厚澤溯四千餘載
之史冊莫有等倫偉烈豐功紀六十一年之政治何能
悉舉今

龍馭上賓星霜未改普天之思慕應與歲月而俱深率土
之攀號惟望

徽稱之允合朕纘承鴻寶嗣守丕基方繼述之是圖豈追
崇之敢後謹命諸王貝勒大臣文武羣臣稽考禮文恭
薦

謚號卿士百辟不謀同辭肇舉上儀恪遵舊典祇告

天

地

宗廟

社稷於雍正元年二月十九日奉

冊

寶恭上

皇考大行皇帝

尊諡曰

合天弘運文武睿哲恭儉寬裕孝敬誠信功德大成仁皇帝

廟號曰

聖祖既表尊親之大義當施逮下之洪恩於戲

帝德難名固揄揚之莫罄

聖功丕顯期昭示於無窮庶慰遐邇之心以協天人之願

布告天下咸使聞知

癸酉諸王大臣等奏請節哀併懇間日詣

壽皇殿拜奠

上諭曰朕因

皇考付託鴻基之重故愛惜此身於臣子哀慕之道十分未盡二三朕非強飾以取孝名但朕受

聖祖皇考四十五載顧復教育深恩今一旦永訣中心悲痛何能自己目今尚可瞻仰

梓宮固極哀思乘此猶可稍展至

梓宮睽隔之後何由再得瞻仰

皇考乎朕躬尚能自持朕亦盡力強制諸王大臣所奏知道了

三月庚子

上諭禮部明季帝王皆不親送梓宮故令親王大臣奉主回京朕既親往若不躬奉

神主於心何安俟

山陵事畢點

主禮成朕親奉

皇考神主回京途間如何分站及先還預備奉迎之處一併詳議具奏

四月戊午總理事務王大臣等以

聖祖仁皇帝梓宮奉安

山陵大禮已成奏請

上御門聽政

上諭曰諸王大臣所奏雖是但

皇考梓宮尚在

享殿安奉朕今即臨御正門理事心實不忍念

皇考付託重大節養朕身一切禮儀多有未盡每以天下萬民事關緊要勉強照常辦理亦無遲誤臨御正門理事俟

皇考梓宮奉安

地宮之後再為舉行

五月己卯大學士等奏

孝陵新產著草由

皇上孝治之感請宣付史館

上諭曰

孝陵新產著草皆由

世祖

聖祖功德隆盛所致非朕孝思所能感格諸臣陳奏剴切
著照所請行

甲辰

上諭禮部朕惟尊親之典首重易名聖善之修必崇顯號
我

皇妣大行皇太后端莊恭肅慈惠安和奉侍

先皇壺儀茂著誕育冲藐

母道備隆顧復恩周命提義盡寬仁逮下澤洽宮庭謙儉
持躬化流禁掖朕繼承大統嗣服鴻基方期合萬國之
歡心奉

慈闈之色養不意遽遭大故

仙馭上升抱痛銜哀感深罔極惟藉顯揚之典少申孝慕
之誠允宜稽考彞章薦升

尊諡應行典禮爾部詳議具奏是日恭移

皇太后梓宮安奉

壽皇殿

上於順貞門內設倚廬以居日詣奠獻

乙巳王大臣等奏請間兩三日

親詣一次

上諭曰朕性本質誠不事掩飾前云強忍節哀言實由衷爾等勿為朕慮惟是

皇妣誕育朕躬慈恩罔極今初成服隔日一詣

梓宮親奠朕實難安按之典禮三次上食俱宜躬親今止一次恭詣已勉從爾等所請矣每日清晨哭奠盡哀方得少展思慕之心儻不勝暑熱力不能支自另降諭旨諸王大臣當諒朕此意遵行勿得再奏

六月丁卯總理事務王大臣九卿翰詹科道議奏

請

四后同祔

聖祖廟

尊諡竝加仁字

上諭曰朕惟

母后升祔

太廟大典攸關欲申臣子之孝思必準前代之成憲務得
情理允協乃可昭示萬年諸王大臣等奏請

四后同祔

太廟引據宋朝太宗真宗四后祔廟之禮朱子及有宋諸儒皆以為允當覽奏既得展朕孝敬無窮之心復合前代斟酌盡善之典不覺悲慰交集恭惟

孝誠仁皇后元配

宸極

孝昭仁皇后

孝懿仁皇后繼位中宮

孝恭仁皇后誕育朕躬母儀天下按先儒祔廟之議一元
后一繼立一本生以次竝列今

母后升祔位次當首奉

孝誠仁皇后次奉

孝昭仁皇后次奉

孝懿仁皇后次奉

孝恭仁皇后如此庶於古禮符合而朕心亦安矣

八月乙亥

聖祖仁皇帝升祔

太廟屆期命大學士等恭奉

神主填青

上諭曰填青典禮所關最重古人必取名望素著德行純粹學問淵深者以充此任今爾等位既貴顯人品皆優是以特加簡命爾等當體朕敬恪之誠潔誠齋戒屏除塵慮儼如

聖祖在天之靈陟降上下誠意所孚洋洋如在方副朕一

片孝思爾等不必有意於哀慟不必有意於儀文只以一誠感格為是

九月辛巳

上諭禮部自古祖功宗德制在不祧饗帝饗親祀應並舉報本之情罔極配

天之典宜隆仰惟我

皇考聖祖仁皇帝亶聰御宇至德誠民早歲而攬弘綱恩覃無外小心以勤昭事誠著升中

寢園備物於春秋

重闡將敬於朝夕軫萬民之疾苦水旱預籌勵百爾之勸
懲賢愚立辨赦愆宥罪仁風廣被祥刑發帑蠲租豐歲
頻聞減賦時邁歌而黃淮底定清問及而稼穡周知闕
里隆九拜之儀考亭躋十哲之列科目以增加而益盛
士子因訓飭而交修

聖自多能心猶好學總百家之閫奧垂千古之典謨經天
緯地之文一貫萬殊之理禹鼎湯盤之句龍翔鳳翥之

書莫不薈萃竝包
皇典麗至於

皇威遠暢廟畧遐宣
臨邊塞而萬幕傾心
示神謨而三孽授首
察哈爾不敢伏莽
厄魯特頓爾傾巢
鄂羅斯稽顙以奉
共球烏斯藏望風而
銷鋒鏑以至波澄紫
海菁靜紅苗雨露及
於天維疆索通於地
紐清寧合撰參兩大
以成能覆載同流兼
三才而立極武功文
德前代之所未聞
聲教車書史冊之所
未覩建中錫福久道
化成萬物逸而

宸衷弗釋其勞四海寧而

皇躬弗辭其瘁六十一載豐功厚澤深浹人心四千餘年

哲后賢君難侔厯服紫壇紺幄知

天意之同符蒼璧黃琮思德馨之竝薦朕纘承丕緒永念
前徽我

皇考聖祖仁皇帝允宜崇祀

郊壇克配

上帝以後冬至祈穀祭

天俱奉

聖祖仁皇帝同

太祖高皇帝

太宗文皇帝

世祖章皇帝配享夏至祭

地亦如南郊祈穀禮祇奉配享其應行禮儀爾部詳議具
奏

十一月癸巳禮部奏

聖祖仁皇帝配享

園丘請

皇上陞殿行慶賀禮

上諭曰朕惟

聖祖仁皇帝大禮告成普天同慶朕陞殿頒布恩詔蓋以
賀

列祖之鴻禧慰萬方之誠悃也然朕思念

顧復深恩中心哀慕今未滿三年不忍陞殿受慶賀禮著

內閣九卿等詳察典禮酌古準今務期於禮允協庶朕
心得安可即確議具奏

壬寅

詔諭天下曰朕惟孝經云孝莫大於嚴父嚴父莫大於配
天禮記云惟聖人為能饗帝孝子為能饗親故周頌著
思文之什大易垂殷薦之辭歷稽邁古侑食始於有虞
爰考前章合祀起於周室所以報功崇德尊祖顯宗也
朕繼承大業綏理萬方既用享於

祈年將升中於

迎日恭惟

聖祖仁皇帝動符乾健靜合坤元廣大高明奉無私以成
化涵弘清穆推至教以乘時育萬物而顯諸仁德周有
截包五行而藏諸用道運不言建極敷猷剛柔竝濟體
元立制仁義兼施禮樂兵農法四序之春秋冬夏刑威
勸賞代六氣之風雨雷霆戶牖三光提封八極東漸西
被北燮南諧中國有聖人瀛海仰日星之臨照王者大

一統遐荒沐霜露之霑濡得一以清得一以寧號均三
大無不持載無不覆幬聲竝兩儀論參贊之成功與天
地而俱泰補化育之不足見民物之咸亨蕩蕩無名豈
梯階之可及蒼蒼在望非測管之能窺三五以來所稱
裁成輔相範圍曲成先天而天弗違後天而奉天時者
惟我

聖祖仁皇帝實克盡之允宜

配享南郊躋壇北時用是上稽前典下慰輿情昭告

天

地

宗廟

社稷率諸王貝勒文武羣臣於雍正元年十一月二十五日冬至恭祀

上帝奉

聖祖仁皇帝配享雍正二年正月初六日上辛祈穀恭祀
上帝五月初一日夏至恭祀

皇地祇竝奉

聖祖仁皇帝配享振金聲以達氣

昊帝來賓捧玉瓚而獻誠

列聖昭格隆儀備舉浩澤均宣於戲貽謀佑啟敢忘覆載
之洪慈對越駿奔儼覩陰陽之合撰青門升燎虔一人
報本之心紺幄居歆協萬國尊親之願布告天下咸使
聞知

雍正二年甲辰二月己酉

上諭諸王大臣九卿等曰欽惟

孝莊文皇后躬備聖德

天錫純禧誕育

世祖章皇帝瑞應昌期君臨萬國逮我

聖祖仁皇帝繼

聖嗣統久道化成立萬世無疆之業皆我

孝莊文皇后福德兼隆之所啟佑也康熙二十六年十二

月

慈馭升遐先期再三面諭我

聖祖仁皇帝曰我身後之事特以囑汝

太宗文皇帝梓宮安奉已久卑不動尊此時未便合葬若
另起塋域勞民動衆究非合葬之義我心戀汝父子不
忍遠離祇於遵化州

陵塋近處安厝我心無憾矣我

聖祖仁皇帝涕泣受

命爰

諭諸王大臣集議僉同於康熙二十七年四月安奉

梓宮於

孝陵之南為

暫安奉殿迄今三十餘年矣朕惟禮經云合葬非古也先
儒又云神靈有知無所不通是知合與不合惟義所在
今

昭陵安奉日久若於左近另起

山陵究非合葬之義且自

孝莊文皇后安奉以來我

聖祖仁皇帝歷數綿長海宇乂安子孫蕃衍想

孝莊文皇后在天之靈極為安妥

遺命諄諄

聖祖仁皇帝遵奉三十餘年今朕身任付託之重

山陵典禮宜斟酌盡善永垂萬世事莫大焉著諸王大臣

九卿等會同確議具奏

十二月壬申禮部奏雍正三年元旦請受朝賀

上諭曰朕即位之初諸王大臣奏請元旦陞殿受賀至再至三朕無可如何准於次年舉行今年元旦陞殿讀表時朕聽之不禁傷感悽然垂淚明歲元旦尚未過三年著停止行禮

己卯吏部尚書朱軾奏稱三年服制已滿恭請裕祭

太廟即吉釋哀

上諭曰朕覽朱軾所奏當之甚愧朕受

皇考四十餘年顧復深恩罔極莫報諒陰三年祇以默盡
一點私情非謂歷代帝王不能行之事朕能行之思欲
立法定制以垂令名也且如祭祀朝會大禮不容久曠
者朕亦勉徇諸王大臣之請照常舉行惟有齋居素服
悲哀思慕盡一己之誠於宮禁之中古人云禮之至者
無文哀之深者無節朕自嗣統以迄於今撫時生感觸
物增悽愴見輿聞潜然出涕情不容以自禁心不能以
自覺遑論其合於古制否乎昔

世祖

聖祖皆以冲齡登極一時禮制容有未備設

世祖

聖祖踐阼之日已若朕躬之年則盡禮盡制必有朕所萬不能逮者今朕抱歎之處尚多敢云盡禮乎至所奏三年以來深山窮谷無不哀思戀慕過密八音等語此乃皇考六十餘年深仁厚澤浹髓淪肌四海臣民哀痛迫切感激思慕愈久不忘出於人心之自然非有所禁約而

然也夫以薄海內外凡有知識之倫尚且哀慕不忘如此况躬為子臣欲報

昊天罔極之德其終身哀慕復何時能已耶朕之衷曲非欲表暴於人特因奏章過於稱揚朕心滋愧故畧為宣寫以示中外

辛巳諸王大臣奏明年元旦伏祈

皇上俯順輿情陞殿行禮進表

上諭曰諸王大臣雖請俯順輿情亦當思仰體朕意朕以

為與其行慶賀禮以示萬國不若盡孝道以示天下二年元旦因行元年之禮故允所請去年長至行禮因

聖祖仁皇帝配

天大典朕不得已勉從衆請至於元旦御殿進表受賀不比尋常之御殿謝恩行禮也朕已降諭旨諸王大臣著即遵行

雍正三年乙巳二月庚辰

上諭直省督撫等朕惟古昔帝王以孝治天下誠以孝者

天之經地之義民之則也故魯論云慎終追遠民德歸厚矣朕以藐躬繼承大統永惟

皇考聖祖仁皇帝顧復洪慈恩德罔極中心哀痛什伯恒情以日易月實所不忍特以

天

地

宗廟大祀朝會重典不容久曠時亦勉從諸王大臣之請遵禮舉行惟於宮庭內素服齋居默盡此心每撫時觸

景輒增悽愴僂見愾聞之際哀發於中潛然出涕古人
云禮之至者無文哀之至者無節實非有所倣而行亦
非欲以立法定制垂譽於天下後世也終身孺慕寧有
已時今諸臣據二十七月即吉之文合辭公請祫祭釋
服朕以禮制情勉允所請於雍正三年二月十二日祫
祭

太廟釋服即吉伏念

皇考聖祖仁皇帝御極六十餘年深仁厚澤普遍寰區

賓天之日凡京畿直省海濱山陬士農工賈白叟黃童莫不呼號哀泣孺慕之誠三載以來有如一日今舉行吉禮應敷告天下朕嗣位以來惟日兢兢嚴恭寅畏不敢怠息庶幾克荷

皇考聖祖仁皇帝付託之重羣黎百姓受

皇考聖祖仁皇帝教育深恩當勉勵忠誠勤守職業言慈言孝克友克恭農夫盡力於南畝工商致精於器用毋尚奢侈毋事浮偽共期歸真還樸比戶可封以無負

皇考六十餘年培養漸摩之至德於朕奉

先思考之心實有賴焉爾該地方官通行曉諭俾薄海黎
民咸悉朕意

癸未諸王大臣等奏服制已滿恭請

皇上於乾清宮聽政

圓明園水土清潔允宜隨時駐蹕

上諭曰國家大禮

皇考

皇妣雖有輕重之別而朕之私衷則

皇考

皇妣不容分視外廷吉禮已令照國家典制舉行若朕於
宮中務期獨盡人子之禮據奏駐蹕圓明園不但朕心
實為不忍

皇考

皇妣之事朕何可有所分別況今之二十七月並非勉強
從事沽取孝名以為觀美祇求朕心之安耳禮盡則朕

心自安朕意已定諸王大臣毋得再奏

庚寅

上諭內閣禮部欽惟

皇考聖祖仁皇帝德稟生安功隆參贊光被四表協和萬
邦集千聖之大成超百王而首出

鴻猷駿業史不勝書今

景陵大禮告成應擇吉恭建

聖德神功碑備紀耿光大烈以昭垂萬世永永無極著敬

謹會議具奏

七月己酉

上諭禮部據奏八月二十三

日皇妣孝恭仁皇后服制期滿請照

皇考聖祖仁皇帝釋服之禮祫祭

太廟頒諭中外等語朕疊遭

皇考

皇妣大事追念罔極深恩莫由仰報三年以來祇於宮禁

之中齋居素服默盡思慕哀戚之忱非敢自謂遵循古禮更不欲宣播於衆也父母之喪人子之心則一而帝后之禮國家之制則殊今八月二十三日屆

皇妣孝恭仁皇后釋服之期著擇日於

奉先殿告祭自行家禮至於頒諭中外可不必行

八月辛巳諸王大臣等奏懇

皇上御乾清宮一應吉禮照例舉行

諭曰三年之內疊遭

皇考

皇妣大事朕追思永慕莫釋於懷今服制期滿大禮告成
諸王大臣等援引典禮合詞陳奏朕念三年持服不過
默盡其心非敢自謂盡孝今雖勉從諸王大臣所請而
孺慕之誠終身不能忘也

丙戌

上御乾清宮召諸王大臣入見垂淚

諭曰父母之恩鞠育顧復為人子者終身仰報不盡而朕

荷

皇考

皇妣教育之恩尤為至深至厚誠所謂欲報之德昊天罔極也三年之中如祭祀朝會國家大禮不可曠缺朕不得已勉從諸王大臣之請照例舉行不過於宮中持服以默盡其心而究未能盡此心於萬一也日月易邁已屆三載禮制有定而朕心無窮此一領素服朕衣之三年今日更換不勝悽愴之至朕之一念豈但三年固結

於中即終身之久亦斷不能忘也

雍正四年丙午八月丙戌

上諭諸王大臣內閣九卿等曰我

皇考聖祖仁皇帝三年大禮已滿朕追念罔極

深恩欲於

皇考忌辰每歲遵照三年以內祭祀之禮永遠舉行恭讀

祝文用申誠悃朕受

皇考教育慈恩至深至厚終身永慕無有窮期豈三年禮

制之所能限况天下億萬臣民感戴

皇考深仁厚澤六十餘年自古帝王罕能比竝一切禮儀亦非定制所得拘也朕舉行此禮乃自展其思慕誠切之衷至與舊制相合與否朕皆不遑計及此禮亦惟朕躬特行之於我

皇考後世子孫不得奉為成例其應行禮儀著該部定議具奏

雍正八年庚戌八月壬戌

上諭諸王大臣等數年以來遵化州

陵寢附近之地方雨暘時若年穀順成今年春月畿輔微覺亢旱而遵化等處則雨澤調勻民人樂業六月日食之期

陵寢之地方則陰雨不見本月十九日京師地震朕繫念山陵憂勞寤寐星遣侍衛等馳往看視今據差回人員及守護

陵寢之大臣等奏稱十九日地覺微動較他處更輕村舍

牆垣悉皆無恙居民竟有未經知覺者朕以手加額五
內歡欣益見我

皇考之聖德神功際天蟠地受眷祐於

上帝貽福慶於蒼生若此之彰明較著朕感

上帝之慈思念

皇考之功德特將近事之顯而可見者曉諭諸大臣九卿
等共知之

大清世宗敬天昌運建中表正文武英明寬仁信毅大孝
至誠憲皇帝聖訓卷三